

四庫全書

史部

欽定四庫全書

會稽續志卷六

宋 張湜 撰

進士

會稽進士姓名慶元二年里人石朝英等始裒輯請于郡刻石於貢院斷自慶歷六年蓋六年以前登科記皆闕其鄉里故不可攷而獨載大中祥符元年杜衍一人者蓋衍嘗位宰相人皆知其為越人也後來郡文掾劉庶復訪遺逸于里之耆舊又得陸軫以下凡七人予稽

之國史質之傳記則姓名可攷者殆不止此如錢昆與弟易皆擢第而易實咸平二年孫暨榜第二人又與二子明逸彥遠俱中制科易嘗掌內制父子皆名聞一時亦可謂里之顯顯者石君乃里人何未之考也予於錢氏四人之外又得剡中史綸及子叔軻姪安民并宏詞

王俊等又十餘人

錢易吳越王之後父侔死于會稽因就葬子孫從而家焉易嘗作僧仲林

詩序云易家世越人也王十朋會稽風俗賦云錢氏世賢科之盛史門繼衣錦之榮注云錢內翰易會稽人景德二年中制科子明逸彥遠慶歷中並中制科剡中史氏兄弟相繼登科鄉號繼錦按剡中之史乃屯田郎綸

及其子兵部侍郎叔軻及姪中大夫安民爾綸
與叔軻乃父子十朋云兄弟蓋一時筆誤也

石刻非

但疎略其間姓名差互者尤如大中祥符五年榜陸軫居傳營之前天禧三年榜孫沔居傳瑩之前政和八年榜孫鼎居姚景良之前俱誤今悉是正之且補其闕逸登載于此庶來者得以考云

淳化二年孫何榜

錢昆

咸平二年孫暨榜

錢易

第二人
昆之弟

景德三年賢良方正能直言極諫科

光祿寺丞錢易

大中祥符元年姚曠榜

杜衍

第四人
相之闕

大中祥符五年徐奭榜

傅營

陸軫

大中祥符八年蔡齊榜

齊廓

王絲

天禧三年王整榜

傅瑩

孫沔
樞

天聖五年王堯臣榜

史綸

天聖八年王拱辰榜

齊唐
廓之弟

景祐元年張唐卿榜

史叔軻

綸之子

寶元元年呂溱榜

沈紳

褚瑄

錢彥遠

慶歷二年楊寘榜

朱奎

茹約

石牧之

石衍之

徐紘

石象之

是年材識兼茂明于體用科

殿中丞錢明逸

父易兄彥遠

慶歷六年賈黯榜

何玠

朱琮

梁佐

陳惟湜

是年賢良方正能直言極諫科

太常博士錢彥遠

皇祐元年馮京榜

闕杞

任秉

闕希聲

王醇

石麟

馮滋

余叔良

胡穆

楊度

王霽

朱方

皇祐元年鄭獬榜

姚甫

韓希文

應瑜

張琦

李燮

是年賜九經出身

顧臨

嘉祐二年張衡榜

章蒙

余京

諸理

理弟

傅傳正

王淵

石景淵

象之子

唐穀

石深之
衍之弟

是年材識兼茂明于體用科

明州觀察推官夏噩

嘉祐四年劉煇榜

姚勔
中書舍人

關景仁

嘉祐六年王俊民榜

錢嶧

顧沂

馮豫

褚珪

張燾

嘉祐八年許將榜

褚唐輔

闕景暉

景仁弟

張濟

治平二年彭汝勵榜

王長彥

余弼

治平四年許安世榜

黃兌

熙寧三年華祖洽榜

陸佃

第三人省元
孫左丞

陳禬

熙寧六年余中榜

石景略

別院省元
深之子

沈箋

王容

淵之子

陸傳

佃弟

韓羽

石景衡

衍之子

關澥

鍾昇

熙寧九年徐鐸榜

史安民

綸之姪

張祖良

黃彥

虞昆

元豐五年黃裳榜

沈充

徐充

戚儀

詹京

蔡繪

黃詔

石景衍

衍之子

是年明經

朱戩

元豐八年焦蹈榜

張獻

丁希說

傅勉

虞賓

梁邁

佐孫

元祐三年李常寧榜

朱興宗

陳毅

元祐六年馬涓榜

石公輔

賜名公弼
兵部尚書

衍之孫

黃特

陳兢

兢兄

朱印

唐翊

橐之子

馮谷

紹聖元年畢漸榜

求移忠

紹聖四年何昌言榜

虞寅

賓弟

虞大猷

陳揚庭

徽宗賜名過庭
中書侍郎

姚舜明

待制

元符三年李釜榜

石端中

黃日新

盛旦

錢克忠

黃無慝

崇寧二年霍端友榜

徐公佐

求元忠

陳濤

唐竦

穀之子

石彥和

景畧子

姚斐忱

方詰

崇寧五年蔡疑榜

石端誠

李光

參政

郁藻

潘彬

大觀三年賈安宅榜

臧言

王上輔

華初平

鎮子

褚唐舉

石公恕

孫寶著

王俊

黃通

張宇發

別院省元
祖良子

待制

政和二年莫儔榜

張公彥

石公揆

景街子
侍御史

翁彥約

朱常

郭亢

高桓

政和五年何棗榜

傅崧卿

上舍魁
給事中

錢唐休

王致柔

王真卿

杜師文

葉汝平

張翮

韓溉

羽子

陸長民

軫曾孫

政和八年嘉王榜

諸葛行敏

黃韶中

通子

姚景梁

孫鼎

陳橐

毅子
刑部侍郎

錢唐俊

唐休弟

宣和元年詞學兼茂科

從事郎新冀州州學教授王俊

宣和三年何渙榜

梁仲敏

邁之子
諫議大夫

石嗣慶

象之曾孫

王賓

黃唐傑

陳陞

王休

俊兄

桂章

孫彥材

宣和四年賜同進士出身

傅墨卿

宣和六年沈晦榜

諸葛行言

行敏弟

胡尚智

謝作

建炎二年李易榜

唐開

毅孫

梁仲寬

邁之子

詹彥若

默子

陳炳

孫適

紹興二年張九成榜

黃嘉禮

葉蕃

杜師旦

石襲慶

改名延慶
嗣慶弟

吳康年

石公轍

特奏狀元
公弼弟

紹興五年汪應辰榜

李孟博

第三人
光子

胡沂

第四人
吏部尚書

虞仲琳

寅姪

石師能

象之孫

王俊彥

王賓

馮羽儀

谷子

虞仲瑤

賓子

馮耀卿

茅密

是年博學宏詞科

左迪功郎明州州學教授石慶

紹興八年黃公度榜

繆渥

紹興十二年陳誠之榜

張攄

歸姓馮

馬佐

詹承家

京孫

唐閱

翊子
起居舍人

詹林宗

承家弟

徐几

傅世修

錢移哲

葉汝士

汝平弟

紹興十五年劉章榜

傅晞儉

黃昇

茹紹庭

梁仲廣

邁之子

吳公輔

張之綱

石塾

紹興十八年王佐榜

王佐

狀元
戶部尚書
俊彥子

張穎

陸升之

高選

陸光之

長明子

周汝士

詹伉宗

沈壽康

茹驤

紹興二十一年趙遠榜

唐準

翊孫

孫大中

紹興二十四年張孝祥榜

虞時中

仲瑤子

黃開

黃閣

黃閣

閣弟

石邦彥

王公衮

俊彥子

貝欽世

茅寵

紹興二十七年王十朋榜

周汝能

許從龍

姚筠

孫安國
通子

紹興三十年梁克家榜

馮時敏
羽儀子

姚廷袞

顧宣

黃聞
閣弟

紹興三十二年賜進士出身

陸游
佃孫
待制

隆興元年木待問榜

王逵

李唐卿

魏中復

石斗文

黃度

兵部尚書

莫叔光

吏部尚書

俞亨宗

許蒼舒

丁松年

乾道二年蕭國梁榜

王日永

致柔子

邢世材

虞汝翼

賓曾孫

張澤

兵部尚書

傅頤

王正之

楊寅

張宗仲

王厚之

杜弼

乾道五年鄭僑榜

陸洙

曾槩

王誠之

正之兄

黃閭

別院省元
閭兄

王訢

兼中刑法

是年博學宏詞科

左迪功郎新差充廣德軍軍學教授許蒼舒

乾道八年王定榜

石宗昭

公揆孫

許開

蒼舒姪

高宗商

改名商老

任惟寅

張拱辰

宗仲姪

錢淦

唐俊子

卜芸

張亨辰

拱辰弟

是年八月賜同進士出身

姚憲

舜明子
參政

淳熙二年

詹騃

狀元
林宗子

桂森

孫應時

方秉文

盛勳

李友直

周之綱

唐錡

石朝英

淳熙五年姚穎榜

徐邦傑

貝襲慶

欽世子

唐淮準弟

厲居正

朱元之

尚樸

陳杞

兼中刑法

淳熙八年黃由榜

諸葛千能

行敏姪

趙廷昂

廷袞兄

魏挺

中復姪

朱元龜

元之弟

陸子愚

長明孫

葉恢

汝士子

梁汝明

宋駒

是年博學宏詞科

從政郎滁州州學教授莫叔光

淳熙十一年衛涇榜

施累

黃邁

度之子

虞時忱

時中弟

吳沄

董之奇

陸洋

白公綽

陶廷俊

姚一謙

淳熙十四年王容榜

石宗萬

宗昭弟
兵部侍郎

周之瑞

黃克仁

詔曾孫

應燮

郭綽

徐三畏

杜思恭

紹熙元年余復榜

陳用之

秦孫犯廟
諱與文學

諸葛安節

別院省元
行敏姪

潘方

莫子偉

叔光子

紹熙四年陳亮榜

宋叔壽

王度

劉宗向

陳用之
再登科

許閔

開弟

慶元二年鄒應龍榜

莫子純

狀元以有官充第二人叔光姪中書舍人

曾勲

王淑

黃伸

嘉禮子

陳無損

馮景中

時敏子

石宗魏

楊拱辰

馮大受

王夢龍

石宗玉

景衍曾孫

方秉成

慶元五年曾從龍榜

呂冲之

張撫辰

宗仲子

李知新

光姪孫

王復明

傅誠

墨卿元孫

胡衛

沂孫

曾黯 聚姪

石孝溥 宗昭子

茹騏

嘉泰二年傳行簡榜

方秉哲

秉文弟
秉成兄

張炳

楊轟

袁一之

開禧元年毛自知榜

黃庭 度弟

盧補之

過文煥

張浹辰 宗仲

申宋說

梁簡

仲寬孫

田廩

任必萬

嘉定元年鄭自誠榜

周之章

之瑞弟

黃虎

諸葛興

行敏姪

余一夔

嘉定四年趙建大榜

李復

光曾孫

榮熙辰

李知孝

光孫

唐檻

翊曾孫

錢難老

茹或

虞植

時中孫

嘉定七年袁甫榜

孫之宏

朱晉

陳亨祖

姚翀

章夢光

嘉定十年吳潛榜

劉漢弼

姚鏞

憲姪孫

陸若川

升之孫

丁輝

希說曾
姪孫

丁燧

輝弟

尹煥

葉明道

汝士孫

周宣子

之綱子

閻璋

章又新

鄭大中

楊權

嘉定十三年劉渭榜

諸葛十朋

行言
魯孫

孫祖祐

應時姪

王秬

過必案

尤孟遠

茅彙征

王祖洽

王爚

嘉定十六年蔣重珍榜

毛遇順

周溶孫

宣子子

莊黻

聞人知名

王建封

寶慶二年王會龍榜

楊瑾

紹定二年黃朴榜

張崧卿

任貴登

張飛卿

勞崇之

呂大亨

紹定四年慶壽恩釋褐賜進士出身

王傑

紹定五年徐元杰榜

陸叡

梁大受

葛焱

施退翁

孫子秀

胡昌

李衢

光曾孫

陳錫禹

楊釋回

拱辰姪

孫自中

王世威

陶夢桂

廷俊孫

楊炎

楊國英

過夢符

王鵬舉

戴鐸

王華甫

陳煥

呂秉南

王景壽

端平二年吳叔告榜

馮喜孫

谷四世孫

俞公美

孫曄祖

嘉熙二年周坦榜

胡太初

余潛子三年中
詞學科第一人

過正已

文煥姪

全清夫

劉曾

孫逢辰

戴得一

鐸兄

錢坤

屠雷發

戴浩

得一子

楊珪

瑾弟

孫壽

袁灝

韓境

琦六世孫

淳祐元年辛丑徐儼夫榜

陳膺祖

鄭熙載

馮平國

淳祐四年甲辰畱夢炎榜

章夢璞

張良孫

任西之

陳熹之

朱元光

楊光子

陳肖孫

李士特

淳祐七年丁未張淵微榜

葉秀發

王公大

孫嶸叟

馮濟國

淳祐十年庚戌方逢辰榜

黃雷

胡夢鱗

王燦

胡杲

孫林

商又新

王祖直

董元發

寶祐元年癸丑姚勉榜

陸遠

孫象先

毛振

夏仲亨

沈翥

神五世孫

陳夢卓

唐震

孫炳炎

李碩

錢恢

寶祐四年丙辰文天祥榜

杜應之

姚會之

何林

劉漢傳

莫子材

張頤孫

徐理

開慶己未周震炎榜

俞浙

季應旂

省試
賦魁

潘時晦

孟醇

朱國英

劉瑞龍

晏垚

陳碩

景定三年壬戌榜

方山京

狀元

黃焱

黃遇龍

華景山

陸天驥

張霆

陳開先

夢卓弟

許稟

省試第
二名

徐天祐

吳大順

吳天雷

王煥

仙釋

苗龍唐初人失其名能畫龍故呼之曰苗龍後得道仙
去今龍瑞宮東南一峯崛起上平如砥人號曰苗龍上
昇臺

陳明欒陵鋪兵也人呼為陳院長年三十有五時犯罪受杖遂蓬頭跣足若喪心者往來行歌無所定止頗能知未來事間與人言初寒烈暑皆不畏避雪中不施一縷卧野橋上氣騰如蒸眼色正碧好以白堊書地且讀且歌字畫類五銖錢文觀者莫識中貴人典領欒宮者憐其寒常遺以衣乃轉與貧者淳熙辛丑歲久不雨鄉民或叩以豐凶應曰木災竹災魚災貧道災俄而高岡發洪山水暴至所經竹木盡拔魚鼈掃空陳大病不食

幾月腹皮皆凹入附骨隱隱見五臟人謂其必死俄復如初有蜀客來道堂見之焚香作禮曰先生正為鄉里化緣造橋安得來此衆始悟其為異人神遊在彼云或問其年庚但云三十五後微疾而終藁葬溪岸未幾其徒發瘞將火之空無一物矣洪文敏公邁特書其事于夷堅辛志云

端裕會稽人俗姓錢氏武肅王之裔孫年十八投大善寺則思落髮受戒具見佛果勤和尚與語大悅勤住蔣

山往依焉勤命典記室尋分坐道聲藹著施旨住靈隱
慈寧皇太后幸韋王第召裕演法賜金欄袈裟紹興十
八年移四明之育王裕莅衆色必凜然寢食不背衆唱
道無倦紹興二十年十月十一日示微疾至十八日索
筆書偈跣趺而逝世壽六十六僧臘四十八荼毘煙凝
五色如車蓋收舍利無數目睛齒舌皆不壞門人奉遺
骨分塔于鄮峰西華初賜號佛智禪師至是諡曰大悟
塔名寶勝

法慈上虞縣長慶寺僧也平日深居簡出灑埽一室終朝宴坐而庭有花竹泉石頗有幽意士大夫暇日多往游焉慈頗能棋又善談論焚香煮茗延納無倦嘉泰初忽謝客閉門慈年高而神觀精爽畧無他故人初不以為異會其童行辭往行在所請給僧牒慈語曰汝去宜速回久之無耗日以為問一日言還慈喜曰得汝歸甚好時方盛暑即令左右速具湯沐浴潔畢易衣端坐一室其徒往視之已將瞑目亟呼之云和尚幸自得恁好

何不留一頌子曰汝不早道我今寫不得也嗣師云但說某當代書乃云無始劫來不曾生今日當場又隨滅又隨滅萬里炎天覓點雪語僅脫口而逝

淨全諸暨人俗姓翁氏世業于農少與父兄躬耕凡至林壑泉石間必宴坐忘歸人已異之甫冠即出家師授以釋典畧無所解廼幡然入徑山投大慧宗杲杲曰汝有何能答曰能打坐曰打坐何為全曰若問何為真是無下口處杲遂知其為法器全生長田家為人朴野而

無緣飾且不能書人呼為翁木大一日集衆採椒全亦預焉同輩有戲之云汝試作一摘椒頌如何全即應之云含煙帶露已經秋顆顆通紅氣味周突出眼睛開口笑這回不戀舊枝頭衆皆嘆異有檀越以一度僧牒施果命結侍者十輩各探籌以卜其分緣全偶得之九人者皆不平之更相詈語果命復探之全再獲若是三探三得之遂師果祝髮受戒拙菴光居靈隱俾典賓混源密主淨慈命分半座為衆入室全志在晦藏無隱世念

然天資夙成不假師授雖不識一丁字而吐詞發語形
為倡頌老師夙學所不能及尚書尤公褒寶文王公厚
之丞相錢公象祖皆與為方外交全自號曰無用累典
大刹最後住四明之天童開禧三年六月二十九日示
寂說偈而逝世壽七十一僧臘四十五以全軀瘞于寺
之西錢丞相為銘其塔

詩文

前志所載詩文起秦漢止晉宋而隋唐以來皆畧之蓋

作者之衆不勝紀錄也但蘭亭詩序與誓墓文皆王羲之作誓墓文足見其出處之大節不特以文筆也故晉史與蘭亭序俱載于傳中志乃錄蘭亭而棄誓墓又白道猷一詩其連峯數十里修林帶平津茅茨隱不見雞鳴知有人之句膾炙古今人口不但見稱於白樂天而已志乃畧附見于僧竺道壹事中殊未為當今悉錄之以補前志之闕高宗皇帝大駕南巡駐蹕會稽暇日觀黃庭堅所書張志和漁父詞因同其韻此日御製又有

登臨望稽山懷哉夏禹勤之句皆是邦光前絕後之盛事也敢敬以冠之卷首併以唐明皇送賀知章詩附之於後以為越紹之佳話云

紹興元年七月十日子至會稽因攬黃庭堅所書張志和漁父詞十五首戲同其韻

高宗皇帝

一湖春水夜來生幾疊春山遠更橫煙艇小釣絲輕羸得閒中萬古名

薄晚煙林淡翠微
江邊秋月已明暉
縱遠拖適天機水
底閒雲片段飛

雪灑清江江上船
一錢何得買江天
催短棹去長川
魚蟹來傾酒舍煙

青草開時已過船
錦鱗躍處浪痕圓
竹葉酒柳花氈有
意沙鷗伴我眠

扁舟小纜荻花風
四合青山暮靄中
明細火倚孤松
但願樽中酒不空

儂家活計豈能名萬頃波心月影清
傾綠酒糝藜羹保
任衣中一物靈

駭浪吞舟脫巨鱣結繩為網也難任
綸乍放餌初沈淺
釣纖鱗味更深

魚信還催花信開光風得得為誰來
舒柳眼落梅顚浪
煖桃花夜轉雷

暮暮朝朝冬復春高車駟馬趁朝身
金柱屋粟盈囷那
如江漢獨醒人

遠水無涯山有隣相看歲晚更情親
笛裏月酒中身舉頭無我一般人

誰云漁父是愚翁一葉浮家萬慮空
輕破浪細迎風睡起蓬牕日正中

水涵微雨湛虛明小笠輕蓑未要晴
明鑑裏縠紋生白鷺飛來空外聲

無數菰蒲間藕花棹歌輕舉酌流霞
隨處好轉山斜也有孤村三兩家

春入渭陽花氣多
春歸時節自清和
衝曉霧弄滄波載
與俱歸又若何

清灣幽島任盤紆
一艇橫斜得自如
惟有此更無居從
教紅袖泣前魚

遠矚稽山思夏后之功
俯瞰濤江懷子胥之烈
賦古詩一首

六龍轉淮海萬騎臨吳津
王者本無外駕言蘇遠民瞻
彼草木秀感此瘡痍新
登臨望稽山懷哉夏禹勤神功

既盛大後世蒙其仁願同越勾踐焦思先吾身艱難務
遵養聖賢有屈伸高風動君子屬意種蠡臣

送賀祕監歸會稽詩

并序

唐明皇

天寶三載太子賓客賀知章監于止足抗歸老之疏解
組辭榮志期入道朕以其夙存微尚年在遲暮用修掛
冠之事俾遂赤松之遊正月五日將歸稽山遂餞東路
乃命六卿庶尹三事大夫供帳青門寵行邁也豈惟崇
德尚齒亦將勵俗勸人無令二疏獨光漢冊乃賦詩贈

行凡遇茲宴宜皆屬和

遺榮期入道辭老竟抽簪豈不惜賢達其如高尚心寰
中得祕要方外散幽襟獨有青門餞羣公悵別深

寄若耶山竺道壹

白道猷

連峰數十里修林帶平津茅茨隱不見雞鳴知有人閒
步踐其徑處處見遺薪始知百世下猶有上皇民開此
無事跡以待疎俗賓長嘯自林際歸此保天真

去會稽郡誓墓文

王羲之

維永和十一年三月癸卯朔九日辛亥小子義之敢告
二尊之靈義之不天夙遭閔凶不蒙過庭之訓母兄鞠
育得漸庶幾遂因人乏蒙國寵榮進無忠孝之節退違
推賢之意每仰詠老氏周任之誠常恐死亡無日憂及
宗祀豈在微身而已是用寤寐永歎若墜深谷止足之
分定之於今謹以今月吉辰肆筵設席稽顙歸誠告誓
先靈自今之後敢渝此心貪冒苟進是有無尊之心而
不子也子而不子天地所不覆載名教所不得容信誓

之誠有如皦日

郡士諸葛興以文行稱于鄉嘗作會稽九頌其
自序云興世家會稽俯仰巖壑惟禹陵所在自
少康建祠今數千載比年時和歲豐邦人奉祀
弗懈益虔因感昔人九歌之作自禹暨嗣君二
相與夫英霸賢牧高人孝女顯有祠宇者輒為
九頌效顰前作念昔楚騷之興蓋出于感憤而
託以規諷後之模倣者如九詠九愁之類往往

皆然興方蹈詠明時又其意主乎景仰先哲固
無所謂感諷也直曰頌云爾間獨妄論古人不
能不發其一二而其歌吟嗟歎因寓之以擬騷
之聲云附見于此以其為會稽頌也

諸葛興登
戊辰進士

第今為江
州彭澤丞

瞻越山兮鏡之東鬱喬木兮岑叢倚青霞兮窈石枕碧
流兮寶宮端黻冕兮穆穆列俎豆兮雍雍梅為梁兮挾
風雨倏而來兮忽而去芝產階兮間見橘垂庭兮猶古

壁騰輝兮珪薦瑞書金簡兮緘石匱朝萬玉兮可想探
靈文兮何祕嗟洛水兮橫流民昏墊兮隱憂運大智兮
無事錫鴻範兮敘疇身勞兮五嶽迹書兮九州宣王心
兮不矜迄四海兮歌謳猗聖宋兮中興駐翠蹕兮稽城
獨懷勤兮曠代粲奎文兮日星揚舲兮拊鼓吳歆兮鄭
舞奠桂酒兮蘭肴庶幾髣髴兮菲食卑宮之遺矩

右大禹陵

肇三聖兮傳一中建人極兮參洪濛元圭錫兮汝績叨

華歸兮汝躬大道公兮均嬗繼家天下兮繇妣氏嵩石
兮發祥謳歌兮與子誓甘野兮服叛養國老兮貴齒席
不重兮味不貳琴瑟屏兮鐘鼓置思皇訓兮克儉心敬
承兮敢陞祀四百兮綿景祚兆大橫兮垂異世越山兮
蜿蜒鏡水兮漪漣煥祠宮兮屹峙肅廡祀兮愉然端冕
兮龍章執圭兮琳琅想規重兮矩疊恍韶奏兮鏗鏘

右嗣王

披竹簡兮典謨聖手斷兮唐虞登羣龍兮輔翊萃一堂

兮都俞知人兮帝之哲動天兮帝之德畫象兮民不犯
舞干兮苗已格迄一旅兮中興嚴廟貌兮稽陵感會遇
兮風雲崇像飾兮股肱憤夷楚兮陵上國思庭堅兮祀
俄忽泚麟筆兮特書喟夷吾兮有力何汲汲兮詭誕謂
明良兮相賊姦雄託兮自文慨齊東兮毋惑仰而觀兮
典禮秩俯而察兮草木殖功之遠兮難名民之思兮無
斁

右二相

睇禹陵兮巋然邃珍館兮螭蛸敞別室兮遺像崇英霸
兮千年詭越民兮非黷祀推世家兮自遷史肇無餘兮
開國傳後裔兮奮起痛夫椒兮深劬同國人兮勞欲採
藪兮食何味嘗膽兮志彌篤封以內兮種所司閭以外
兮蠡所知羌厲志兮澡恥迄乘時兮決機盟上國兮王
致胙按山南兮恢土宇陟鑑臺兮睨東海矩天門兮模
地戶惜規圖兮不宏幾弓藏兮犬烹蹇七術兮遺恨悵
五湖兮遐征尚蟬嫣兮復續終與享于鼻祖之庭

右越王

書畀姒兮力溝洫民奠居兮勤稼穡降穰劉兮言水利
嘉鄴渠兮夸鄭國慨元光兮瓠子決彼鄒封兮河之北
悼一言兮貽時害諉天事兮非人力昔越守兮得賢侯
慮遠久兮為民謀鏡一湖兮陂萬頃備渚泄兮歲有秋
寧殺身兮利人抑洙泗兮稱仁嗟後來兮私已吾湖兮
寢湮湖之復兮疇繼侯之心兮萬世酌清流兮擷蘭芷
奉明薦兮非昵祀

右馬太守廟

典午西兮金谷輩渡而多兮藹多士嘉內史兮屏浮華
淡物累兮頤天粹升治城兮遐想友東山兮雅志修稷
事兮蘭亭觴曲水兮羣英追雩風兮涵泳渺萬化兮均
平紀清遊兮感慨剡形忘兮神詣蔚闕 一札寶連
城兮千祀太傅起兮為蒼生扶晉闕 符秦內史歸
兮樂山水師萬古兮飭孫子出闕 兩賢意易地兮
皆然

右王右軍祠

山簇簇兮環湖水淼淼兮縈紆人何遊兮明鏡鳥何飛
兮畫圖懷賀老兮今昔想逸致兮林廬老之襟兮天濶
老之神兮秋月飛翰兮龍鸞吐詞兮冰雪際熙運兮開
元司縟典兮春官凌玉霄兮倚華蓋驂駿馭兮升西崑
俄清夢兮綿綿恍乘雲兮登仙覲紫皇兮玉宸聆九奏
兮鈞天賤天公兮遂志鼓予枻兮錦里吾朋兮鷗鷺吾
賓兮煙水野服兮蹕蹕斑衣兮娛戲緬高賢兮非苟于

去就其庶幾兮東門之傅鵠夷之子

右賀監祠

虬龍起兮龍翔耀兵威兮八方法羽林兮嚴禁衛握鈞
陳兮掃欃槍視諸將兮噲等伍咨舊臣兮忠且武聳萬
目兮矩矱衛九重兮心膂維東南兮都會辱吾王兮填
撫暢威惠兮千載隤福祥兮茲土瞻衮服兮煌煌薦蕙
肴兮葵觴匪震懾兮羅池亶愛思今

闕

兮流

後裔更累葉兮奮忠義孰旌表兮陪廟

闕

門兮厲

斯世

王之四世孫堅
見唐忠義傳

右城隍龐王

閔

分江之湄懷予心兮肅祇表卓行兮尚之祀垂
妙辭兮淳之碑嗟窈窕兮踐天性一念烈兮萬古鏡山
眉兮蒼蒼江練兮茫茫江之水兮可竭娥之靈兮不可
歇

右曹娥

會稽續志卷六

欽定四庫全書

史部
會稽續志卷七

詳校官監察御史臣沈孫璉

檢討臣德生覆勘

總校官知縣臣楊懋珩

校對官中書臣李 霖

謄錄監生臣沈安邦

欽定四庫全書

會稽續志卷七

宋 張湜 撰

雜記

前志有雜紀一卷蓋會萃諸書之言越事者然遺逸尚多輒採摭傳記以補其未備改越為山陰實自始皇前代地理書曾不畧及黃公之賢列于四皓在秦漢時乃里人也後世亦罕知之非越絕書及會稽典錄則泯然無傳矣故特表于卷首又予曩嘗有雜說一編其間一

二條偶記越中事今刪取而附之卷末云

山陰得名于秦

秦始皇三十七年東遊會稽徙大越民置餘杭尹攻故
鄣因徙天下有罪適吏民置南海故大越處以備東海
外越乃更名大越曰山陰

越絕書

秦刻岑石

秦始皇帝東遊到大越留舍都亭取錢塘浙江岑石石
長丈四尺南北面廣六尺西面廣尺六寸刻文立於越

東山上其道九曲去越二十一里

同前

黃公嚴遵

會稽太守王景興問士于虞翻翻對曰鄞大里黃公潔已暴秦之世高祖即祚不能一致惠帝恭讓出則濟難徵士餘姚嚴遵王莽數聘抗節不行光武中興然後俯就矯首不拜志凌雲日皆著于傳籍較然彰明

會稽
典錄

梅梁

大梅山在鄞縣東七十里蓋漢梅子真舊隱也山頂有

大梅木其上則伐為會稽禹祠之梁其下則為它山堰之梁禹祠之梁張僧繇圖龍于其上夜或風雨飛入鏡湖與龍鬪後人見梁上水淋漓而萍藻滿焉始駭異之乃以鐵索鎖于柱

四明圖經

按前志餘姚梅渚湖在縣東北十八里舊經云昔有梅樹吳時採為姑蘇臺梁湖側猶多梅木俗傳水底梅梁根也有巨木湛卧湖心雖旱不涸不露十道志又云吳起建鄴宮使匠人伐材至明塘溪口梅下俄

見樹長堪為梁伐材還都梁已足無用而此木一夜
飛還土人異之號曰梅君今在溪中水旱則自浮沈
一云用為禹廟梁是也舊經又云梁時修廟惟欠一
梁忽風雨漂一木至乃梅梁也今以二鐵絙繫楹間
又傳夜或大雷雨梁輒失去比復歸水草被其上人
以為神縻以鐵繩然猶時一失之據此則又非因僧
繇所畫闕異也今梁在禹殿側長不能尋丈乃他木
耳猶闕鐵或謂梅梁久已神化故非其舊抑詩人

好奇見多題咏當有卓然不惑者能究其實故備述之以見同異

禹廟元圭

越州禹廟有元圭匱藏之色黑如黧徑五寸厚寸餘肉

好相倍上下有卽州將常封鑰

泊寶記或謂元圭得于太原藏于御府今廟中

所存未必真也

蘭亭水黑

山陰蘭亭有逸少硯池寺曰天章以藏真宗皇帝御書

故也當朝廷每有頒降詔札則池水盡黑可以染緇太

常少卿沈仲嘗紀其事

同前今亦不然

玉帝賜黃汝楫五子登科

越人黃汝楫家頗富饒宣和中方臘犯境以素積金銀緡錢瘞于居室避地山間忽賊黨執白旗來揖且拜黃驚懼答拜認其人蓋舊僕也云吾主將拘掠士女閉之空室持金帛償則釋之否則殺黃惻然問所囚幾何人曰無慮千數曰我藏物可值二萬緡欲舉以獻而贖其

命可乎歸報如其請乃悉發所瘞輦輸其營千人皆得
歸詣黃謝為之誦佛祈福歡聲如雷亂定夢金甲神從
天而下呼謂之曰玉帝有勅以汝活人甚多賜五子科
第至紹興中黃為浦江令其子開閣閱同登乙科後二
子聞閣繼之如神所告

唐少卿宅

會稽唐氏居新河坊蓋宣和中鴻臚少卿翊所營也會
連守楚泗台三州未嘗家食前後門雖具皆未開守舍

者但自側戶出入少卿長子閔由鄭州通判代還一術士善相宅至唐氏新居夜登屋卧視云此宅前門開則出兩府後門開則出臺諫而所應者非本宗其後建炎四年高宗駐蹕于越凡空第皆給百官寓止謝任伯為禮部尚書居此宅拜參知政事中使宣召開門赴都堂治事上虞丞婁寅亮與唐為姻家暫假館投檢奏封章乞立繼嗣中旨除監察御史開後門詣臺供職言果驗云

養素先生

明州定海縣補陀洛迦山蓋觀音大士示現處遠近致
禱或見善財童子金剛神達磨等相紹興十八年三月
史越王以餘姚尉攝昌國鹽建偕鄱陽程休甫泛海詣
山扣寶洞禮謁無所覩但感淪茗浮花闕殊不愜
晦時再往一僧指巖頂有竇可以下闕而上忽

見現闕

色身照耀洞府眉目瞭然程所覩亦然惟公更

見雙齒如玉雪天將暮有一長僧來訪云將自某官歷

清要至為太師又云公是一好結果底文潞公它時作
宰相官家要用兵切須力諫後二十年當與公相會于越
遂告去送之出門俄不知所在乾道戊子公以故相鎮
越一夕典客報有道人稱養素先生言舊與丞相接熟
不肯通刺字疾呼欲入謁亟命延之貌粹神清譚論鋒
起索紙數幅大書云黑頭潞相重添萬里之風光碧眼
胡僧曾共一宵之清話遽擲筆不揖而行公大駭遍遣
兵吏尋覓不復見追憶補陀之故始悟長身僧及此道

人皆大士見身也相距二十年淳熙己酉公正位太師
自道本末云爾

石師聖不願賜錢

會稽新昌石師聖家極貧甘于枯淡未嘗以利欲為心
小女求十錢買線無以與之女入房啜泣石歎曰吾家
世清貧固窮守約致汝如此命也日且暮聞中庭索索
如埽錢聲出視之堆積階下已及三千緡覆以青布巾
石夫婦奉繼母王氏焚香拜禱曰師聖家雖枵單亦可

自給若蒙上天昭祐使母子康寧得保常產福垂後裔
天之賜大矣非義之財不敢受俄覺青布漸低錢忽
飛上庭空如掃石又下階謝時宣和元年也明年長子
嗣慶魁鄉舉遂擢第又三舉次子延慶繼之復中博學
宏詞科為時名士

新昌石氏墳

新昌石氏之祖本山東人因適越挈家徙居焉時有韶
國師善地理每經從石必迎佇致敬其妻嘗出拜曰夫

婦皆年老欲從師求一藏骨地韶許之與往近山得一處五峯如蓮花溪流平過其下回抱環揖指示之且絕識窵穴而去翁媪葬焉其後數十年孫曾登科相仍至以百數宣和以後頓衰越五舉略無齒鄉書者而里中一民家產寢豐生四子容質如玉或告石氏是人竊以父骨埋于君祖塋之上故致此密引石往發土得木桶藏枯骸其中棄之民家自此遂微四子相繼夭逝先是石塋有棠梨一本每抽新枝則族系一人必策名若改

秩或一枝萎折則有當其咎者民思報怨夜往伐其樹

自是科級視昔年弗逮云

並夷
堅志

翟公巽用越事精當

翟公巽帥越郡人安其政迨去相率投牒借留公知之
命取牘以來即書其上云固知京兆姑為五日之留無
使稽山復用一錢之送其用事精當如此

梁溪
漫志

陳舜俞知山陰不散青苗錢自効

熙寧三年六月降屯田員外郎知山陰縣陳舜俞監南

康軍鹽酒稅坐違詔旨不散常平錢物自効也

國史其自

効云臣準州牒前後錄降勅命及轉運司提舉常平廣惠倉司牒等近準勅條將常平廣惠倉錢斛依陝西青苗錢例每于夏秋已前約逐處收成時酬價立定額支每斗價例曉示召人情願請領隨稅送納斛斗或納時價貴願納見錢者並許從便雖時價極貴比之元數取利不過二分即不得障遏民戶不令請領及有不願請者亦不得一例抑配者臣伏見民間出舉財物其以信

好相結之人月所取息不過一分半至二分其間亦有
乘人危急以邀一時之幸雖取息至重然猶不過一倍
比及收斂或賫持饋餉務為歡悅詣門負載不責輸送
或始約緡錢而償穀粟始約梁稻而償布縷斂者以得
為幸償者不一而足至有改為後期變取庸賃下雖魚
鹽薪蔌糴鉏錡釜之類皆以其價取之蓋苟不務此貧
疾逃亡空有質劑官不為理此天下出舉之常也今朝
廷所置官局募民以青苗貸取錢斛以為寬農振乏之

惠故所設法槩以周密出舉給納皆從民便然要之人情以米粟出納不若用錢之簡便也今使有司必約中熟為價貸民以錢度吾民非歲大稔米穀至賤亦必償緡錢而出所謂二分之息耳然所謂二分之息者今約為六月而以算數求之在民間一倍取之于民猶足為補助蓋不思責辦州縣朝會輸送卒無逋負之理欲如私家雜償他物勢亦無由倉庫給納人情迄取如影隨形雖皋陶設法而身行之亦不能盡比之民間取與相

安而無督責威刑之懼臣以為雖曰官所取闕息尚輕固已不減民間一倍之重矣勅意又慮州縣不能曉知新法之意而以錢斛抑配百姓故復申飭講解著為條約然臣體問方今小民匱乏十室八九應募之人不召而至何可勝計為國論者反憂抑配斯過計矣蓋譬如孺子見飴蜜必染指爭食然父母疾止之恐其積甘足益生疾今為民官長止其窮濫不使受貸輕費終蹈督責之困愛之惜之不為無意昔者祖宗著令諸以財物

相出舉任從書契官不為理保全元元之意蓋深遠矣
今乃官自出舉設為賞罰獎勸惡吏誘之以便利督之
以威刑方之舊法亦已異矣且臣再讀詔書以為賑民
乏絕抑兼并法無出此及見有司申明科條又使十戶
為甲甲中須有上三等一人充保浮浪無抵當之人不
得一例俵散夫謂之浮浪鄉人之所不保止是乏絕至
是濱于轉徙溝壑之人今固不蒙其惠矣復欲藉此以
抑兼并臣恐法終行特為天下兼并之地耳何以言之

天下之有常平倉非能人人計口而受餉也蓋市井田里常有穀價踴貴之時官以常平之粟減價賤糶則積穀者自然不得復珍市深藏以邀貴價于是生民陰受其賜矣今朝廷以新法散常平為青苗唯恐不盡使倉庫既空饑饉薦至則兼并之民必乘此時有閉糶而貴糶者未知州縣將何法以制之斗粟萬錢未可知也此豈不為兼并之利哉臣又竊為兼并者之計今官既放無庸爭利但可藏錙坐待隣里之人逋負青苗惡吏嚴

督之時賤買人之田宅和質人之妻孥而已此臣故曰
特為兼并之利也詔意又恐州縣避事不務推行新法
抑逼人戶不肯俵散是尤不然臣嘗私為州縣主者之
計令必使奉行新法姑縱之貸亦不患斂之之難也蓋
朝廷設法已分為夏秋二料五月放秋料正月放夏料
所斂秋料正在正月間所斂夏料正在五月間不過
給秋料使以納正月所舉者給夏料使以納五月所舉
者則其出民力者但計所當息錢益所給為所納耳若

然則是使吾民一取青苗錢終身以及世世一歲常兩輸息錢無有窮已萬一如此則是別為一賦以敝生民非朝廷王道之舉也臣雖愚昧嘗深世務官于縣道職在愛民今不敢苟免按問雷同官吏誘陷小民日入困敝在犬馬之心亦深惜輕誤聖朝別生此賦所有青苗新法難以奉行謹具狀自劾以聞

舜俞文集

舜俞以嘉祐四年制科第一人至是法當召試因此遂繳納召試劄子

其奏有云臣官于縣道世謂畏途行身至危臨事無術

簡書正密未必保全日月尚賒恐須追奪其中書劄子

一道不敢祇受謹奉表辭避繳納以聞

文集史謂舜俞尋上書稱青苗

法實便初迷不知爾參知政事馮京欲緣此復用之宰相王安石曰為人反覆如此豈可用也故京師有陳舜俞白悔青苗之語聞者以為笑此語恐傳者之過何以言之按舜俞有南康軍到任謝表其間有云伏自陛下大明繼照百度惟新臣忝預搢紳粗知鼓舞逮奉青苗之法目為大政之先衆人以謀始之難駭其近利愚者雖成事而闇尚欲有言若乃懷異議而奉行張空文而布告諷止民利欺罔朝廷人或自然臣則不敢使舜俞果上書再稱青苗實利則表中豈敢復為此言樓鑰題舜俞集後云王文公得君用事法變更新諸若大臣爭不能得抵巇取爵位之人不可勝數風俗為之大變至有遠在蜀萬里外官為偏州騰奏于朝盛稱青苗新法

之美而捷取膺仕者公方宰山陰既嘗中大科例以秩滿登館閣小忍不言豈不足以干進而飛章力辯繳納召試堂劄自取竄責而不悔哉讀此則前事之誣可以無辯矣

記李莊簡公語

李參政罷政歸鄉里時時來訪先君劇談終日每言秦氏必曰咸陽憤切慷慨形于色辭一日平旦來共飯謂先君曰聞趙相過嶺悲憂出涕僕不然謫命下青鞵布襪行矣豈能作兒女態耶方言此時目如炬聲如鐘其英偉剛毅之氣使人興起後四十年偶讀公家書雖徙

海表氣不少衰丁寧訓戒之語皆足垂範百世猶想見

其道青鞵布襪時也

陸放翁渭南集跋
李莊簡公家書

石昉墓枯木

石氏宗譜新昌石昉墓前有枯木生而內向覆墳如蓋然守墳者言每有登科者則柘有枝特生一枝一人或

二三枝則二三人云

王十朋會稽
風俗賦注

真宗旌表裘氏門閭

真宗皇帝嗣位之十四載十一月詔下會稽旌表裘氏

門閭從守臣之請褒孝義勵風俗也昔裴牧為大夫世居中國至十七代孫睿仕西晉值永嘉之亂隨元帝渡江避地婺女遂隱而不仕其子

關

徙居會稽縣

南三十里世勤耕桑家積仁義越五代當聖宋乾德年踰六百載人無別居內不異爨大中祥符四年郡邑始能知裴氏尚至可暄已十九世矣暄孫治始從學有文行稱于族中為鄉里推重因薦于縣縣薦于郡郡奏于朝廷勅下旌表門閭蠲復徭役治生子四人曰仲容仲

華仲舒仲莊仲容事母尤謹慶厯中母病急仲容兄弟
倉皇侍疾醫治無驗歎曰吾聞古人有割肉可以愈親
疾者乃割股飼母弟仲莊亦將割之聞兄已進乃止母
食之果瘥是時雲霧蔽覆其家里人駭觀精誠之感也

過最裴氏
義門記

神宗旌表劉氏門閭

熙寧十年余為越州聞上虞縣娥眉鄉劉承詔家同居
四百餘人同籍者十世具以上聞乞不以常制之限旌

表門閭廣厚風俗既而特賜可奏有司于是即其居之前建所謂綽楔門門外左右以土築臺高下廣狹至于赤白之飾既皆如勅之格而常賦之外悉免徭役與仕者等皆如律之文

趙林劉氏
義門記

朱娥

朱娥越州上虞縣朱回女也幼失所恃鞠于祖母一

關

鄰人朱顏聞之莫不潰散娥年方十歲奮

躍呼號冒前抵顏顏力屈勢蹙祖母雖中傷賴以脫去

娥懼追及挽終不釋顏不勝其忿手刃娥數十卒斷其
吭氣隨絕假息猶恐及其親也獄具祖母猶坐詬詈郡
從事虞公太寧進議曰論次誠宜顧無以慰沒者之志
太守張侯從而釋之仍以其事聞上後三月有詔安諭
其家賜帛六束米三斛鄉人壯而義之為設祠位春秋
祭焉從事虞公適當其時乃疏其本末著之石刻故僕
得以考其詳而知歲月之攸始實治平三年二月甲午
距今四十有九年矣云云政和四年八月記

江公亮朱
娥親祠記

立朱娥祠與曹娥祠夾江相望墓在上虞縣西一十二

里

華鎮覽
古集

姚令聲

姚宏字令聲越人也父舜明廷暉嘗任戶部侍郎令聲
少有才名呂元真為相薦為刪定官以憂去秦檜之當
國屢求官不報張如瑩澄與令聲為中表令聲托為扣
之秦云廷暉與某靖康末俱位柏臺上書尼瑪哈乞存趙
氏拉其連銜持牘去經夕復見歸竟不簽名此老純

直非狡獪者聞皆宏之謀也繇是薄其為人如瑩以告
令聲令聲曰不然先人當日固書名矣今世所傳秦所
上書與當來者大不同更易其語以掠美名用此誑人
以僕嘗見之所以見忌已而言達于秦秦大怒思有以
害之會令聲更秩調衢州江山縣適當亢旱有巡檢者
自言能以法致雷雨試之果然而邑民訟其以妖術惑
衆追赴大理竟死獄中初令聲宣和在上庠有僧妙
應者能知人休咎語令聲云君不得以令終候端午日

伍子胥廟中見石榴花開則奇禍至矣令聲初任監杭州稅三載足跡不敢登吳山將赴江山自其諸暨所居趨越來訪帥憲既歸出城數里值大風雨亟歇路傍小廟中見庭下榴花甚開妍甚可愛詢祝史云此伍子胥廟其日乃五月五日令聲慘然登輿未幾遂罹其禍弟寬字令威學問詳博注史記行于世三乘九流無所不通紹興辛巳歲完顏亮寇淮江浙震恐令威云木德所照當必無他故詔書云歲星臨於吳分是也高宗幸金

陵以其言驗令除郎召對奏事之際得疾仆於榻前上
念之亟用其弟憲于朝憲後登政府

王明清揮
麈後錄

李莊簡公詩

李莊簡公光作詩極清婉可愛予嘗見其越州雙雁道
中一絕云晚潮落盡水涓涓柳老秧齊過禁煙十里人
家雞犬靜竹扉斜掩護蠶眠後在政府與秦檜議不合
為中司所擊命下送藤州安置差密院使臣伴送公戲
贈之云日日孤村對落暉瘴烟深處忍分離追攀重見

蔡明遠贖罪難逢郭子儀南渡每憂爲共墮北轅應許
雁相隨馬蹄慣踏關山路他日重來又送誰亦婉而有

深意

雲溪
雜記

李孟博

李孟博莊簡公之子也苦學有文紹興五年進士第三
人及第莊簡南遷隨侍至貶所遂卒于瓊州未卒數月
前忽夢至一處海山空濶樓觀特起雲霄間有軒榜曰
空明先世諸父皆環坐其間顧指其一曰留以待汝既

寤知其非祥也未幾遂屬疾臨終有雲氣起于寢冠服
宛然自雲中冉冉升舉瓊人悉見之莊簡有詩悼之云
脫屣塵寰委蛻蟬真形渺渺駕非煙丹臺路杳無歸日
白玉樓成不待年宴坐我方依古佛空行汝去作飛仙
恩深父子情難割淚滴千行到九泉

關

王佐以第二人升大魁莫子純以大魁作第二
紹興五年廷試唱名有官人黃中第一高宗曰故事如
何沈與求曰皇祐初有官人沈文通第一仁宗曰朕不

欲以貴胄先天下寒畯遂以馮京為第一文通第二上
曰此故事也乃擢次名汪應辰為第一人自後秦熺董
德元許克昌趙汝愚莫子純許弈皆有官為第二而陳
誠之王佐梁克家蕭國梁鄒應龍曾從龍俱以第二人
升惟政和八年嘉王楷第一登仕郎王昶第二徽宗宣
諭嘉王云有司考在第一不欲以魁天下以第二人為
榜首昶遂以有官人為第一予家有是年登第人告語
云勅頭王昶是擢昶為魁甚明今登科記尚以嘉王為

第一人非也

按是年五月九日有旨同年闕止用第
一人嘉王楷字惠遠登科記只據小錄

不曾見登第人告
又不曾考國史

五夫非秦封松處

秦始皇下泰山風雨暴至休于樹下因封其樹為五大
夫初不言其為何樹也後漢應劭作漢官儀始言為松
蓋樹在泰山之小天門至劭時猶存故知其為松也五
大夫蓋秦爵之第九級如曹參賜爵七大夫遷為五大
夫是也後人不解遂謂松之封大夫者五故唐人松詩

有不義五株封之句皆循襲不考之過也紹興府上虞縣有村市曰五夫故老云有焦氏墓于此後五子皆位至大夫因而得名近世好事者或異其說曰此秦封松為五大夫之地也紹興間王十朋為郡幕官搜訪所聞作會稽風俗賦得此遂以為然故賦有楓挺千丈松封五夫之句疏于下云上虞有地名五夫始皇封松為五大夫之處蓋越人但知始皇嘗上會稽刻石頌德不知封松乃在泰山時非在會稽時也而十朋復失于致審

遂以為實予嘗過其處見道傍有古石塔有刻字尚可
讀迺會昌三年余球所記云草市曰五夫因焦氏立塋
于此孝感上聖而為名焉乃知五夫之名實由焦氏惜
乎十朋之不見也

並雲溪
雜志

拾遺

會稽山為東南之鎮隋開皇間詔就山立祠天寶中封
神為永興公後加永濟王今廟在鎮塢著于祀典廟闕
之間像設已不經而禹廟又有稽山神祠不知何時俗

工于神像之下塑一白雞蓋訛會稽之稽為雞犬之雞

疑以傳疑謂蟲雞所食也于是相傳神能司百蟲凡神

前土偶異狀有手持蜈蚣虵虺者綠衣

闕

百蟲

司判官凡農圃庫店有螟螣鼠蛙之

闕

祈賽以

所塑者赤幘而白羽故所殺必以

闕

知幾千百

雞也往歲東萊呂延年為郡幕經此祠遊觀命屏去雞

蟲然愚俗相承割雞如故猶以孤山為大小姑子胥為

多髯非有識者殆不可告語也又禹祠句踐之傍復塑

一婦人像云西施也尤不經之甚他日必有能是正之者因併記以俟

苦竹城在山陰縣常喜門外西南二十九里越絕書苦竹城者句踐伐吳還封范蠡子也華鎮詩云一葉扁舟激浪花當時兒女永驚嗟歸來苦竹城池就始覺忘家是保家

八仙塚在會稽縣五雲門外東四十五里地名白塔嵇叔夜過越宿傳舍遇古伶官之魄而得廣陵散其聲商

絲綏似宮臣偏君晉謀魏之象也其名廣陵散離散播
越永嘉南遷之兆也曲終指其葬處至今窟穴猶在
石門在嵯縣五十餘里謝靈運隱居之所也靈運詩云
躋險築幽居披雲卧石門即此地也

華鎮會稽覽古集餘姚縣四明山廣利侯祠前有雙石
如筍挺然數尺野花叢生其頂杜鵑鳴時爛若霞錦國
朝祖宗過密皆三年不榮職方齊唐嘗為之贊鎮詩云
千尺相高卓翠岷雨餘雲外露鱗皴鼎湖龍去蒼髯斷

三載叢花不記春予按廣利侯廟實在上虞縣南五十里非餘姚也不知鎮何據而云四明山也鎮云齊唐嘗為之贊今唐贊云越州上虞縣雙筍石云云此固明言為上虞矣豈鎮得于傳聞未嘗見此贊耶唐集又有上虞縣重修廟記言之尤詳記云廟中筍石雙峙峭若桓表有芳樹二特生其端春物向榮鱗蔭如續屬太宗真宗遘密之際痼疾者二載慶蹈之旦韡萼依然讀此則鎮誤無可疑者

潮蹟

六合之外聖人存而不論六合之內聖人論而不議潮六合內物也愚生長海濱往來錢塘五十年矣幼讀文粹得唐盧肇所賦已知其疎貧不能盡見天下書獨以意推測攷之靈素之經驗之氣血之運稽之陰陽揆之物理舟師蜚戶旁究曲詢盡潮之情極潮之變欲論其所以然之狀未敢也晚閱高氏會稽

志所載抱朴子吳地志丘光庭鄭遂燕龍圖

諸家之說自遂而上荒忽誕謾不足論獨錢

塘之潮天下偉觀燕公所謂沙潭

徒旦切

已盡

其理諸家言錢塘者盡廢愚之說念不可以

不槩見則設為問答凡十七條輯而賦之名

曰潮蹟顧豈敢自以為是哉後世有揚子雲

猶庶幾其不廢云耳嘉定甲申仲春朔日同

安朱中有書

或問盧肇云潮及晦乃絕過朔乃興月弦乃小贏月望乃大至又曰月之與潮皆隱乎晦又曰日月合朔之際潮殆微絕是耶非乎

答曰非也肇未嘗識潮晦前兩日潮已七八分矣或晦日已及十分朔日正屬大汛而云潮隱乎晦合朔之際潮殆微絕可乎肇以月之盈虧為潮之大小合一月兩汛之潮獨歸之望謂潮始大至不知朔與望均大至也

或問盧肇云日激水而潮生又曰潮夜大而晝稍微又曰天左旋入海而日隨之日之至也水其可以附之乎故因其灼激而退焉退于彼盈於此潮之往來不足怪是耶非乎

答曰非也日之西沒東出悉有定時如肇所論日絕東海水長而退西退則東長日漸向東則潮漸長日東出海則潮漸落則是一晝夜但一潮耳今一日一夜凡兩潮隨十二時遞為進退常差四刻正晝當午

日固麗天未嘗入海潮之大至固自若也肇乃謂潮
夜大而晝稍微豈其然乎肇之不識潮審矣肇賦始
舉此兩端既不識潮其餘繳繞遷就之說不辯可也
或問子言盧肇未嘗識潮所賦不必攻而自破既聞命
矣敢問抱朴子所謂夏潮大冬潮小春潮漸起秋潮漸
落又云天河隨天轉入地下與海水合三水相蕩天轉
排之故激蕩而成潮是耶非乎

答曰非也此與盧肇之不識潮均一律耳夏潮晝甚

小夜乃大冬潮晝稍大夜乃小春秋之中潮極大晝夜適相等所謂天河特以形似豈真有水晝夜之間天未嘗不轉苟如其說激蕩成潮則是潮晝夜不息何得一晝夜間再進再退其說疎矣

或問吳地志云潮水晝夜再來來應時刻常以月晦及望尤大至二月八月最高又云子胥種蠡之神是耶非乎

答曰所言晝夜再來朔望尤大至二月八月最高此

真識潮可以破肇與抱朴子之謬矣曰胥蠡云者非也

或問丘光庭設漁翁問錢塘之潮所以特大而激湧者是耶非乎

答曰非也光庭謂浙之發源不過千里江水入少海水入多故潮特大此不必它求慶元定海海口至上虞堰下無三百里江水可謂入少矣而潮之入固平也

或問鄭遂洽聞記所論是乎

答曰非也其論乃衍抱朴子無足辯

或問燕龍圖潮是耶非乎

答曰序固言之錢塘潮頭沙渾所激諸家之論盡廢
今子欲詳之乎嘗試與子于一溝之內觀之引水滿
溝則其水必平進于溝之半累碎石而為齟齬從上
流傾水勢必經齟齬而半寫于下水之激湧無怪也
燕公所謂渾者水中沙也錢塘海內之渾亘二百里

夫水盈科而後進潮長未及潭則錢塘之江尚空空也及既長而冒之自潭斗瀉入江又江沙之漲或東或西無常地潮為沙岸所排助其激湧震天動地洊洊而來水之理也曷足怪乎愚所謂齟齬者猶之潭耳故錢塘潮候率遲于定海者定海平進而錢塘必俟登潭而後至于江其初來也從浙江亭望之僅若一線非潮小也闕遠所見微耳漸近則漸大非潮大也所見漸近則漸大固宜及夫潮退則或由潭中

低處或從潭兩尾滔滔以至於海蓋潭中高而兩頭漸低高處適當錢塘之衝其東稍低處乃當錢清曹娥二江所入之口錢清江口潭最低潮頭甚小曹娥江口潭稍高于錢清故潮頭差大是說也習于海道者莫不知之子欲詳燕公之說愚不得而詳之也

或問前人之論或是或非既聞命矣敢問子之說何如
答曰愚不敏何足以語此物格知至粗嘗學焉欲知潮之為物必先識天地之間有元氣有陰陽元氣猶

太極也絪縕兩間希微而不可見陰與陽則生乎元氣者也本之而生亦能為之病焉

詳答在後

何者為病常

暘常雨是也當陰陽二氣之極則元氣不能勝

詳答在後

子欲知之幸反覆其問

問者曰子所言元氣陰陽二氣與乎潮者何也

答曰夫水天地之血也元氣有升降氣之升降血亦隨之故一日之間潮汛再至一月之間為大汛者亦再一歲之間為大汛者二十四元氣一歲間升降為

節氣者亦二十四潮二十四汛隨之此不易之理也
問者曰潮之隨元氣升降也子何以知之

答曰察于吾身而知之也一身之中有元氣有陰陽
元氣蓋所受以生者既生矣則血為榮氣為衛血為
陰氣為陽周一身而不可見者元氣元氣之運周流
于脉絡而血乃隨之一日之潮凡再進退一身之血
隨氣而進晝夜未嘗息也攷之素問用鍼之法常以
日加之宿上從房至畢十四宿水下五十刻半日之

度也從昴至心十四宿水下五十刻終日之度也從房至畢為陽從昴至心為陰陽主晝陰主夜靈樞經曰水下一刻人氣在太陽二刻在少陽三刻在陽明四刻在陰分水下不止氣行亦爾又難經脈候人一日一夜凡一萬三千五百息脈行五十度為一周漏水下百刻榮衛行陽二十五度行陰亦二十五度故五十度復會于太陰寸口注云人氣始自中焦注手太陰行其經絡計二十四亦復來會于太陰此是脈

之大會始終各計二十五度以此推之人氣一晝夜之間行陰行陽各二十五度潮一晝夜隨元氣升降者審矣

問者曰子言一歲二十四氣潮隨之為二十四大汛者其畧具矣然朔望為大汛之候而節氣十有五一一易散諸一月之中不專在乎朔望潮何為而不隨之

答曰元氣一晝夜小升降故一日之間潮凡再至一月之間大升降故十五日而易一節以律管候氣驗

之管之長短不同某氣至則某管應元氣升降有小
有大審矣天地之數奇而不齊者也故月有小盡大
盡歲有一閏再閏潮之為大汛也隨大小盡與閏亦
未嘗差焉驗潮之大小莫若錢塘與西興也雖以朔
望為大汛之候然晦前三三日望前一二日潮蓋有
登聞者或朔日二日三日四日不登聞至五日而始
大或十五十六十七十八十九二十不登聞至二十
一而始大西興之閘稍低于錢塘或至二十三日潮

亦登此無它節氣參差不齊則潮亦為之進退如前
所云或攬前在二十九三十及十四十五或落後在
初四初五十九二十二十一其大槩固如是也

問者曰子言二十四汛隨二十四氣詳且明矣或有非
時而潮忽大當汛而潮忽小者何也

答曰愚測之審矣非朔望正汛而大或當汛而反小
蓋適遇巨風風順則推之而來後浪擁前故忽大而
且久不退風逆則抑之而退前浪遏後故驟小而且

久不進耳

癸未九月二十七八間東北大風慶元城外沿江平地潮丈二尺餘河水為鹹鹵所

雜魚悉浮此其驗也前史所記海溢入非由巨風蓋天地之變元氣之病者是也

問者曰潮一晝夜小升降則三百六十之晝夜大小一律可也今夏之日晝潮小夜潮大冬之日晝潮大夜潮小俗所謂潮畏熱畏寒是耶非乎

答曰潮畏熱畏寒雖出俗說實確論也愚固言之矣陰陽生乎元氣至其極也元氣有不勝焉夏為極陽日昃乎晝陽氣特盛元氣雖升而為至陽所迫氣不

得伸故潮亦不得而遂格之于物以火爨鼎水半於鼎火氣既升水從而湧此元氣升而潮進之象也于鼎之上置鐵炙牀熾炭其上則湧水為火所協而復下此潮當進而元氣為至陽所迫而不遂也冬為極陰日既西沒陰氣特盛元氣為至陰所薄而潮不遂正與夏同亦猶鼎水方湧以疎箔覆鼎置巨冰其上冰氣嚴沍湧水復下均一理耳畏熱畏寒俗說是矣特不能推其理耳

問者曰子言夏晝冬夜元氣為至陽極陰所勝潮不得
遂者是矣敢問夏夜冬晝潮能大者何也

答曰夏晝陽極元氣為陽所勝冬夜陰極元氣為陰
所勝故潮小夏夜日既沒陽氣少衰冬晝日既出陰
氣少斂元氣得伸故潮得遂而稍大此甚易見驗之
于身夏之日陽特盛榮血得行

素問謂血
淖液是也

故面與身

多紅而澤氣則喘促咽塞呵之而無所覩氣陽也為
至陽所勝故不能自伸猶潮之畏熱而小也日既入

陽漸殺

去聲

人氣少舒猶潮至夏夜而能大也冬之夜

陰特盛榮血稍縮

素問謂血凝泣如水中居雪

故指面皴而肌革

燥人呵氣則油然而出皆可以見血陰也為至陰所勝其不能伸猶潮之畏寒而小也日既出人血少舒猶潮之至冬晝而能大者皆一理耳

問者曰夏晝潮當小而能稍大夜當大而反小冬晝潮當大而反小夜當小而反大何也

答曰此乃陰陽之氣錯繆顛倒夏當南風以陽方助

至陽故元氣為至陽所迫而潮小或者北風起以陰
方氣從所勝而來陽為之辟易故潮遂能稍大夏夜
潮宜大也乃與晝日同其微者三伏中或陽氣酷烈
融而不收陰不足以禦之故潮亦從而小冬或冰雪
不解涸陰沍寒故晝日宜大而反小冬夜宜小而反
大者冬當北風以陰方助至陰故元氣為至陰所薄
而潮小或者風從南至以陽方氣從所勝而來陰為
之辟易故潮亦能稍大此乃陰陽之變元氣之病耳

問者曰元氣升降四時則均何獨八月潮特大詠歌游
翫特盛此時何也

答曰何獨八月二月之潮亦甚大也何者極陰極陽
故冬夏之潮有小有大二月八月月望前後陰陽之
氣適中元氣得伸潮得遂其大也固宜錢塘風俗喜
游二月花時競集湖山間非獨不暇觀潮而天色尚
寒弄潮兒難以久狎于水故是月之潮無所稱道八
月乍涼而天色猶熱弄潮兒得盡其技人情久厭城

居故空巷出觀以此獨稱八月潮大耳

吳地志亦載
二月八月潮

時大其
說極是

問者曰潮之為義既聞其詳請賦其畧如何

答曰唯唯

吾聞三才之道相與並立未有天地是謂太極太極之
分為陰為陽離一而三極固自如所謂元氣猶太極之
一也人之生也稟乎血為陰而氣為陽元氣無形而非
出入之息也天地雖大具于吾身氣之所至血亦隨之

水者天地之血海為水之所歸元氣升降而水有進退故潮者元氣之升而血之溢也人之血氣分晝夜而行陰陽潮亦晝夜再至信斯理之必也元氣有大升降一歲之中為節候者二十四潮之汛亦二十四此灼然之明驗而非出于臆也人之血冬為極寒所薄故指皴而皮毛枯人之氣夏為至陽所鑠故呵之而無所覩猶夫夏潮小于晝冬潮小于夜元氣為陰陽所勝則不得伸而潮亦莫能遂其餘也今夫爨鼎而湯湧爨者元氣而

湧者潮濕火置冰于鼎之上則湧者復下潮之畏熱畏
寒夫又何足怪也凡百川之接于海潮之進也皆緩獨
錢塘之為江勢洶湧而湍悍江之接于海也既廣外復
隔于沙渚徒旦切潮冒渚而斗寫為天下之偉觀觀夫潮

之將來先

去聲

以清風渺一線于天末旋隱隱而龍龍忽

玉城之嵯峨浮貝闕而珠宮爾若鵬徙又類鼇抃蕩瀾
衝突倏忽千變震萬鼓而霆碎掃犀象于一戰既膽喪
而心折亦神悽而目眩已而潮平迤邐東去探造化而

默識考物理而頓悟寧曰怪神豈藉人力皆一氣之自然紛衆論之辟易笑祖龍之回渡凜氣讐而怵惕悵吳兒之浮誕謂强弩之可射暴秦東游欲厭王氣武穆捍堤萬世之利乃今日之駐蹕發天地之奇祕朝見曰朝暮見曰夕表臣子之至敬實取象于潮汐俗呼沙曰澤儼皇居之壯麗來玉帛于萬國鬱葱蒨而佳哉綿宗社而千億謂余不信請觀于潮亦足以知中興之可冀而識天地之闔闢也

潮蹟既出親舊書來問閏年多兩汛與節氣二十四
不相應愚答之曰前問答中謂天地之數奇而不齊
月有大小盡歲有一再閏潮之為大汛隨大小盡與
閏亦未嘗差節候參差不齊故潮信亦有攙先落後
之異此數句特舉其畧不曾細細條析故未免致疑
耳今以壬午癸未甲申三年一閏考之壬午正月一
日雨水次年癸未次甲申置閏在甲申八月是年十
二月十九却是乙酉正月立春節壬午少了一個節

氣甲申年尾却多了次年節氣十二日三年雖是多
一個閏而節氣只是七十二個遞相乘除均攤其間
蓋節氣自合均在三百六十六日內雖大畧十五日
一易然壬午年五箇節氣十六日一易一箇節氣十
四日一易癸未年五箇節氣十六日一易甲申年六
箇節氣十六日一易三年中展了十六日縮了一日
若不展填不得
本身所餘六日更增十八箇小盡添得一箇閏月折
除外只多兩日今以甲申本年論之雖是十三箇月

有二十六汛前八月二十九秋分閏月十五寒露九月一日霜降節氣只是十五日潮未嘗不同之蓋天地之數不齊節氣贏縮全在巧歷運用若謂閏月多兩汛則甲申年頭占癸未大寒八日年尾占乙酉立春十二日謂之閏年多兩節氣可乎况年有閏潮亦有閏何以言之一日兩潮一月六十潮人知其如是而已一潮遞差四刻

俗謂一潮差五里

兩潮占十二時八刻

以一月十五日一汛按錢塘餘姚潮候初一午時日

潮數至十五日子時夜潮只有二十九潮蓋初六日
日潮申末夜潮五更後初七日日潮寅時晚潮酉時
所謂日潮寅時即是初六夜五更之潮在此處遞互
趲欠一潮以一月計之欠兩潮一年欠二十四潮五
年欠百二十潮正當再閏兩箇月折得恰好以此益
知潮與節候未嘗有纖毫差但今人曉厯法者少愚
亦只能言其大槩耳今當于賦中非出于臆也之下
增入年之有閏潮亦有之計一月不盡之潮積于五

年之再閏攷節氣之贏縮蓋未嘗不相入也然後潮
之情變無餘蘊矣

會稽續志卷七

欽定四庫全書

會稽續志卷八

宋張湜撰

越問

孫因

越問序

莊爲越人也仕楚而爲越吟夏統越士也入洛而爲越
唱越俗之好吟咏其來尚矣亦聞有大述作者乎蘭亭
有序脩禊事也金庭刻銘愛輕舉也康樂山居之賦陶
性情也微之州宅之詩寫物景也若是者謂之大述作

可乎曰未也若昔河東柳先生會萃三河之遺事網羅
千古之異聞作為晉問以昭來世斯文也可謂大述作
矣先生晉人也居晉土習晉事為晉問職也晉有堯之
遺風不可以有加矣居乎越者亦知越之事可與晉方
駕乎晉堯都也越舜禹之邦也古有三聖人越兼其二
焉加以種蠡之所經營王謝之所栖隱司馬遷李太白
杜少陵之所游覽以至國朝諸名賢之所流詠班班可
攷而大述作未聞也惟紹興間狀元王公以幕府元僚

援筆作賦搜竒抉異雄麗偉卓雜用二京三都晉問體
蓋自有會稽以來之大述作也然嘗熟復詳繹其間猶
未能無遺恨焉何者越之四封最為廣袤南踰句無北
界禦兒東至于鄞西盡姑蔑至後漢時提封尚數千里
今之越雖非昔之越然都督一道封疆猶不為狹而斯
賦所錄止及境內之山川此其遺恨一也會稽土地所
宜以金錫竹箭為稱首職方氏九牧之貢莫先焉蓋金
錫竹杖戎備所資非其他一草一木比正當表而出之

而是賦所述乃雜舉夫杭林桑蠶楓松梓桐雞頭鴨脚
馬乳鳧茨木蘭海榴園蔬木菌之屬他郡獨無之乎此
其遺恨二也並海魚鹽之饒東南大計仰焉柳河東晉
問于魚鹽一物各為專條以侈其富饒鋪張揚厲無慮
數百字彼三河所出尚未敵海藏之什一也茲賦纔一
語及之往往纖悉于赤鯪黃頰之族而闕畧于縱壑之
巨鱗搜羅乎餘朴石英之品而簡棄夫積雪之寶鹽此
其遺恨三也紹興之初翠華巡幸駐鳴蹕者彌年實履

舜禹之故迹升州為府冠以紀元且嘗就行殿舉大享
禮中興之業于此乎濟可謂是邦曠絕之盛典而茲賦
俱不之及此其遺恨四也然自有越以來所謂大述作
者獨此一賦而已王公作賦後五十七年有書生孫因
自句章徙餘姚逍遙鹿亭樊榭間處越土為越民飽越
飯酌越水每欲補越絕之所未載廣越賦之所未備而
未能也又九年帥憲新安汪公衣繡衣持玉節森畫戟
載朱幡臨制七郡四十二縣臺府多暇百廢具興輪奐

恢閔山川改觀。鯀生幸覲盛事。竊謂越為大都會。公有大規模。以其大學問大力量。寓于大建立大施設中。興百年所未覲也。獨無大述作可乎。宗工鉅儒之記述。騷人過客之題咏。金石震耀黼黻。周張韶鳴。濩應宮唱。呂和所謂述作亦一時之盛矣。使張平子左太冲柳河東諸人見之。將曰此大規模也。談何容易。他郡小小創制。因革則伐石為一記。濡墨為一詩足矣。獨施之越則不可。越舜禹之邦也。牧是邦者舜禹之臣也。而可易言之。

乎愚不敏成越問一篇釐為一十五章凡三千九百五十字借楚辭體而去其羌許謬侘之聲倣晉問意而削其詰屈聱牙之製非足以發揚會稽之盛庶幾附郡志之末云

篇引

典午氏之盛時兮余鼻祖曰子荆謀樂郊以隱居兮賜

漱石之清名

孫子荆少時隱居謂王濟曰嘗欲漱石枕流

有聞孫曰承公兮

嘗令鄞與餘姚愛會稽之山水兮爰徙家于茲城

孫氏本太

原人至承公家于會稽性好山水求為鄞令後為餘姚令當永和之九年兮惠風暢

夫春莫偕王謝之諸公兮會脩禊于蘭亭賦臨流之五

言兮寄幽尋之逸興泛迴沼倚修竹兮松風落而泠泠

會蘭亭者四十一人孫承公賦五言詩有曰迴沼激中遠疎竹間修桐因流轉輕觴冷風飄落松維興

公尤好事兮作流觴之後序助逸少之高致兮齊芳譽

于難兄

王逸少作蘭亭序孫興公作後序有高嶺千尋長湖萬頃藉芳草鑑清流等語興公名綽承公

也既乃登陸而游兮歷天台與四明漱飛瀑于筆端兮

遺擲地之金聲

興公作天台賦云登陸則有四余自句
明天台又曰瀑布飛流以界道

章徙姚兮倏綿歷乎十稔慨風流之寢邈兮幸猶為夫

越氓掬清泉之潺湲兮友過雲之溶洩訪樊榭之杳靄

兮栖石牕之瓏玲

並四明山勝景屬餘姚

客有過余兮謂余博覽

而好古世為越人兮胡不志夫越之風土余謝不能兮

偃余指而縷數前有靈符之記兮後有龜齡之賦

宋會稽太

守孔靈符郡人也為會稽記王公龜齡作會稽賦

嗟彼皆已為陳迹兮時亦隨

夫所遇儻含毫而不能兮將羞余之鼻祖

封疆

九州皆有山鎮兮職方氏獨先會稽

周禮職方氏東南曰揚州其山鎮曰

會稽居九州之先

射祥光於斗分兮占星紀于天倪牽牛炳其

初躔兮屆須女之七度少陽當其正位兮為萬物之潔

齊

保章氏九州分星注星紀吳越也晉天文志自南斗十二度至女七度為星紀會稽入牛一度漢地理志

曰粵地牽牛婺女之分越虞翻對曰會稽上應牽牛之宿下當少陽之位易繫辭巽東南也言萬物之潔齊也

南控引乎閩粵兮北連亘乎鉅海

會稽志會稽自漢順帝時所領十四縣其

地南踰閩越西限浙江東北入海

日出扶桑之東兮風行浙河之西

詳見

虞翻對

八山蜿蜒其中蟠兮羅千巖以為障

府城內有八山顧愷之云千巖

競秀萬壑爭流

三江匯而旁注兮渺萬壑以為谿

國語子胥曰吳之與越三

江環之韋氏解吳江錢塘江浦陽江

洞天崦岬以連雲兮俯九垓其如芥

宛委山陽明洞天

洪濤沸渭以拍天兮轟三軍之鼓輦宅卧龍

之岿崑兮蠡城屹其環繚帶平湖之浩漭兮雲鏡鑄而

天低闕陵門而四達兮八風颯其遞至飛翼樓而舞空

兮天門沈其可梯提封萬數千里兮運甌吳于掌上七

郡四十餘縣兮歸中權之總提茲古今之大都會兮為

九牧之冠冕諒天地之設險兮他郡寧得而攀躋客曰

偉哉山川兮信美矣其無慊然吾聞故國兮不以山谿
之險

金錫

觀地產之所宜兮惟金錫之最良貢品肇于有姒兮暨
蒼姬而加詳雖歷代之所珍兮凜英氣其猶祕甌冶子
之神竒兮爰採取而鍊淬剖赤堇而出錫兮山色變而
無雲澗若耶之銅液兮俯不見夫潛鱗鑄嶺岌其插天
兮冶井浸而寒冽前豐隆為擊橐兮後雨師為灑塵發

銅牛之藏屑兮赭林麓以炊炭棄右冶之餘滓兮草木
為之焦爛炎煙漲乎銅孤兮寒光浮乎鍊塘越砥安其
斂顰兮鑄浦沸其若湯合衆靈而成器兮為寶劍凡有
五曰湛盧與巨闕兮蓋珍名之最著既屬之善相之薛
燭兮復謀之南林之處女水試則斷蛟螭兮陸用而剗
犀虎掃攬槍使澌滅兮伏蚩尤使奔怖豈吳鉤之敢抗
兮非燕函之能禦客曰偉哉利器兮誠為越國之珍斯
劍客之喜談兮非文種之願聞

竹箭

維苗山之竹箭兮稟勁氣于乾坤實東南之美材兮聲
價等乎瑤琨良工相夫陰陽兮加利鏃以為矢習國人
于射瀆兮震電激而星奔挾之以六千之君子兮從之
以八千之子弟可以償方張之闔閭兮走善射之樓煩
彼羣仙之會聚兮亦以射而為樂登石室之射堂兮射
東峯而的白丁令威為拾箭兮山土下以求索獲遺鏃
于樵夫兮償以樵風之南北客曰異哉斯事兮誠振古

之怪奇然越人之彎弓兮則談笑而道之

魚鹽

百川會同滄海兮浩不知夫津涯吐雲濤以瀾汗兮沃
日御而渺瀰藏巨靈之鼉鼉兮見天吳之惚恍載五山
之業莪兮涵百怪之陸離巨魚出沒其中兮不知其幾
千里鼓浪沫以成霧兮噓雲氣以成霓任公子之投竿
而釣兮五十牂以為餌閱期年而得魚兮牽巨鉤而下
之髻鬣怒而刺天兮白波湧而山立膏流溢而為淵兮

顱骨積而成坻自浙水以東兮無不饜若魚之肉彼赤
鱖黃顙何足數兮又况梅魚與桃鮐維天地之寶藏兮
有煮海之醯鹽曝曜靈以撓沙兮浮蓮的以試滷編簞
簞以為槃兮處烈焰而不灼霜鉛倏其凝沍兮雪花颯
其的皦茲海若之不受寶兮豐功被乎天下抑造化之
自然兮詎人為之力假客曰富哉魚鹽兮此越國之寶
也是特以利言兮吾願聞其上者

舟楫

越人生長澤國兮其操舟也若神有習流之二千兮以
沼吳而策勲尋笠澤以潛涉兮北渡淮而盟會擅航烏
之長技兮水犀為之逡巡浮海救東甌兮有握節之嚴
助治船習水戰兮榮衣錦于買臣渡浙江而誓衆兮會
稽之內史率水棹以拒戰兮凌江之將軍坐大船若山
兮公苗山陰之傑汎彼襲番禺兮季高永興之人想萬
船之並進兮紛青龍與赤雀風帆儵忽千里兮駕巨浪
如飛雲今競渡其遺俗兮習便駛以捷疾觀者動心駭

目兮相雜襲如魚鱗客曰盛哉舟楫兮他郡孰加于越
然同濟或不同心兮請置此而新其說

越釀

揚州之種宜稻兮越土最其所宜稷種居其十六兮又
稻品之最奇自海上以漂來兮伊仙公之遺育別黃私
與金釵兮紫珠貫而纍纍酒人取以為釀兮辨五齊以
致用滑鏡流之香潔兮貯祕色之新瓮助知章之高興
兮眼花眩乎水底侑謝傅之雅遊兮陶丹府而哦詩集

羣賢以觴咏兮浮罰觥乎子敬指鳴蛙為鼓吹兮暢獨
酌于稚珪斯越酒之醞藉兮非宜城中山之比矧投醪
之醇德兮能使勇氣百倍于熊羆客曰旨哉越釀兮固
越俗之所怡然自征權之法行兮安得薛戎而蠲之

越茶

日鑄山之英氣兮既發越于鎔錙地靈洩而不盡兮復
薰蒸于草芽雖名山之最晚兮為江南之第一視紫笋
若奴臺兮又何論乎石花維瑞龍之為品兮與此山以

相亞意山脈之貫通兮仙種同乎一家汲西巖之清泉
兮松風生乎石鼎滋芳液于靈襟兮沆瀣集乎齒牙歐
公錄之歸田兮蘇仙流諸佳咏伯玉註于詩版兮文正
賞其甘華至雁塔與花塢兮固郡志之所載若餘姚之
瀑布兮尤茶經之所誇嗟陸羽之不逢兮宜鑑味之絕
少世方貴夫建茗兮孰有知夫越茶客曰世非不知兮
顧茗禁之已苛亦幸其不盡知兮姑舍是而言他

越紙

繫剡藤之為紙兮品居上者有三蓋篠簜之變化兮非
藤楮之可參在晉而名側理兮儲郡庫以九萬曰姚黃
今最顯兮蒙詩翁之賞談加越石以萬杵兮光色透于
金版近不數夫杭由兮遠孰稱夫地繭半山愛其短樣
兮東坡耆夫竹展薛君封以千戶兮元章用司筆硯數
其德有五兮以縝滑而為首發墨養筆鋒兮性不蠹而
耐久惜昌黎之未見兮姓先生而為楮使元輿之及知
兮又何悲剡藤之有客曰嫩哉越紙兮有大造于斯文

然世方好紙而玉兮又烏知乎此君

神仙

陽明太元之天兮乃羣仙之所游有金堂與玉室兮挹
方丈與瀛洲伯經得道泉兮乘雲氣于木杪仙公韜光
丹井兮發函書于船頭騎青驪以入市兮薊子訓之賣
藥切鯢魚以作鱸兮介元則之垂釣弘景寄跡釣槎兮
隱吏栖于梅市廣信駕龍白日兮羽人萃于丹丘擷芝
草以為侶兮左元放之金液食桂屑而飲水兮范少伯

之扁舟煉日精以回形兮虞翁色若嬰孺位上清而標
籍兮思元跡混俗流嚴青能服石髓兮終斷穀而輕舉
伯陽煉成神丹兮雖蛻形而不留御天風而上征兮與
日月以齊壽皆地勝之所招兮舉塵寰而少仇客曰神
仙信有兮特祕怪而難求吾聞越多隱君子兮試詳言
而旁搜

隱逸

謝隱士當少微兮精神見乎天文嚴子陵應客星兮光

芒動夫至尊居剡下高潔兮戴安道之父子游嵩嶽以
偕隱兮孔述睿之弟昆卻米餉而不受兮朱百年之夫
婦愛肥遯以就閒兮阮萬齡之祖孫閉蓬戶以觀書兮
淳之棲于窮岫輕白壁而不盼兮景齊隱于日門扣藥
船而引聲兮歌競傳于仲御漁鏡湖以賦詩兮島尚號
于方干黃公列乎四皓兮成定儲之羽翼嵇康儕于七
賢兮著養生之至言王子猷咏招隱兮愛山陰之竹種
謝靈運賦山居兮採地黃與溪蓀著貂裘坐巖石兮弘

之志不在釣施豹席與梭橋兮志和豈羨回軒彼皆不
事王侯兮以高尚而辟世亦地氣之所鍾兮多秀水與
名山客曰士各有志兮斯固古之逸民夫何欲潔其身
兮弗念君臣之大倫

句踐

昔句踐兮思報吳問國政兮五大夫辟田野兮實倉府
訪疾苦兮字幼孤抱冰兮握火置膽兮坐卧采藪兮與
葛側席兮闔左觴酒豆肉兮必均其施樂不盡聲兮食

不致味驚鳥匿形兮踰一十祀吳無稻蠡兮越有地利
一朝興師兮三戰得志姑蘇既墟兮橫行淮泗伯東諸
侯兮賀貢畢致赫然雋功兮又何可議客曰異哉兮彼
長頸而烏喙如其可與共樂兮何鴟夷之遠避

舜禹

帝舜生于姚丘兮地近夷而居東母握登感天瑞兮漾
祥光於大虹歷山其所耕稼兮陶漁皆有遺跡二女降
于媯汭兮百官備而景從大禹巡于輔山兮會羣臣而

計功執玉帛者萬國兮戮後至之防風託菲飲以名泉
兮鑿了溪而宅土發金簡于石匱兮藏祕圖于山中望
邑名夫虞姚兮山靈護夫禹穴儼廟貌於千古兮遺化
被于無窮繫帝王之所在兮宜風俗之近古習孝弟與
勤儉兮亦好遜而上忠客曰於戲大哉兮又何可以比
隆然有為者亦若是兮豈無與舜禹之事同

駐蹕

維六飛之南渡兮橫濤江以東歷後舜禹三千年兮履

舜禹之遺迹駐翠蹕以彌年兮因改元而頒詔爰陞州
而為府兮冠紹興之大號舉大享之上儀兮即行闕而歲
祀視總章與重屋兮亦庶幾其遺意登堂而望稽嶺兮
懷克勤之令德留建炎之御製兮彰復古之素志采上
虞之囊封兮終然法乎舜禪山鬱蔥以蜿蜒兮鍾禹陵
之佳氣御香四時來下兮道冠蓋以相望拱觚稜于雲
闕兮儼威顏而天咫繫百年之父老兮及親逢乎盛事
想天民之視阜兮與虞夏而同治客曰幸遊舜禹之邦

民
兮復逢舜禹之君然倘無舜禹之臣兮孰能牧舜禹之

良牧

自大駕之西遊兮府遂為于近藩賜行殿為府治兮暨
擇牧之惟艱張毘陵首當是選兮實股肱之舊弼仍土
階之素規兮因舊宇以為安朱忠靖繼剖符兮屹具瞻
于巖石趙忠簡亦相望兮凜清風而獨寒忠定王之來
鎮兮當乾道之四禩捐帑以置義租兮闢宮而祠先賢

諒崇陰之蔽芾兮思召伯其如憇宜大封于是邦兮良
天道之好還後五十餘年兮誰儷美以增飾維我新安
公兮驚逸駕而獨攀剖滯訟如漸流兮召雨暘如應響
使百城俱按堵兮令滄海無驚瀾立吏膽于秋霜兮洽
民氣于春澤出干將于寶匣兮照沆瀣于銅盤園扉鞠
為茂草兮麥岐藹其連秀令修戶庭之內兮民樂湖山
之間既修政而人悅兮文書省于幙府新百廢以具興
兮聳輪奐之偉觀八邑不知有役兮一道不知有費若

天造而神設兮豈民力之或煩化榛莽為宏麗兮敞隘
蔽為爽塏葦蠹撓而雄疊兮易朽腐而堊丹茲棟隆之
規模兮特于此乎小試非成毀之相仍兮數循環而無
端鎮越歸乎中踞兮修廊翼其旁拱何獨斂夫散氣兮
所以重夫中權巨扁揭乎雲霄兮鈞筆粲乎星斗山靈
為之呵護兮珍光赫而屬天前方臺之月華兮後蓬萊
之雲氣左燕春之凝香兮右清白之寒泉繞層城以拂
雲兮開屏障于四面卧林影于雲壑兮栖山光乎二軒

吸平湖于酒杯兮浮翠峰于茗椀送鴻歸于天外兮數
飛鷗于海門動秋聲之撼撼兮泊晴嵐之靄靄餞崦嵫
之夕照兮賓暘谷之朝暎上越王之危臺兮誦唐人之
傑句鷓鴣飛而地迴兮晴絲裊而天寬飛蓋游乎清夜
兮羃輕煙之素練棹歌發乎中沚兮浴明月于金盆麗
譙湧乎青冥兮角聲起而寥亮佳山蔚其照眼兮洗萬
里之陰霧新隄平而擬掌兮沸行歌以載路漕渠濬而
舉甌兮鼓千艘而駢闐雄威徧營壘創兮雷歡聲于貌

虎泮宮修貢闈闢兮遂飛躍于魚鳶臺府煥而一新兮
巖壑為之改觀他人視之拱手兮公談笑而不難既游
刃之有餘兮復善刀而藏用寂然若無所營兮湛中襟
而靖淵炷爐香而讀易兮悟至理于泰否託寄軒之刻
柱兮等遽廬于乾坤上方蕝事明庭兮將入扈于豹尾
如旄倪之借留兮紛截鐙以攀轅繫郢曲之寡和兮信
蕭規之難繼民願公無遽歸兮帝謂吾兮召環雖卿月
之暫駐兮幸臨照夫越土恐使星之遷次兮迫泰階之

魁躔推治越之道治天下兮固我公之餘事然越人愛
公如慈父母兮願託歌而永傳客乃歛衽肅容兮屏氣
弗敢復言孫子於是濃墨大字兮終夫越問之篇



會稽續志卷八

書重刊會稽志後

右會稽志宋嘉泰初元知紹興府歸安沈公作賓肇纂直華文閣致仕山陰陸公游序者二十卷及寶慶初元郡士梁國張湔續而自序者八卷歲月因循屢更翻刻我朝百四十年來版失既久本之僅傳于時者蓋千百之十一零落益甚成化弘治間前郡守戴公游公亦嘗注意設局廣集儒流欲刪古就今統于一志竟未有成正德庚午夏郡守益都石公自惟志

書政事攸關慨然以為已任協謀于二守福山張公
判府金陵王公節推吉水毛公乃徧訪旁求其舊志
一得于馮揮使家有元至元五年八月紹興路儒學
官書印記事多模糊闕者十之三一得于監生陶秩
有續志復舛謬參雜一得儒士張傳世傳者頗完亦
不甚同又逸其首編一得抄本于儒士羅頌舊錄于
郡局者尤倍顛倒脫誤或此有而彼無或彼否而此
是得失相半蓋皆非初刻原本久于沿襲而然公猥

命縱集以較讐縱重公盛舉雖衰老頓荒不敢固辭
遂繙閱各本正其譌補其闕而秩其次第無所于闕

者仍舊空之惟以儒學官書為據游付刊手王廷珊
夏存誠等十有五人端相鋟梓經始于正月二十五
日落成于九月十日凡一千六百工板五百一十五
幅一千三十前志續志共一部該一十有二冊其傭
餐等費悉出于公俸之捐銀計一百一十兩民不知
勞事咸就緒噫數百年廢墜舊典一旦遇公舉而必

復之為後來繼續之地良非偶然自宜有當代名公
鉅儒文章妙天下者為序而表公德政風化之詳于
無窮茲何容喙但志之所載文字浩繁其金根魯書
錯認踵譌之失尤恐未能免也尚冀觀者其正諸是
歲九月十日後學山陰王綆謹識

陳氏曰會稽志二十卷通判吳興施宿武子郡人
馮景中陸子虛朱鼐王度等撰陸放翁為之序首
稱禹會諸侯而以思陵巡守陞府配之氣壯文雅
蓋奇作也嘉泰辛酉六年已七十七矣未幾落致
仕為史官至八十五歲乃終其筆力老而不衰于
此序見之續志八卷梁國張湜撰續記辛酉後事

而亦補前志之遺前志無進士題名此尤其不可
遺者也見鄱陽馬端臨貴與著文獻通考

會稽續志後序